

to ellos andauan fuera de Murçia, que ge lo fagades entregar pagando ellos las debdas o fiaduras que deuián; et que les guardedes et fagades guardar el preuilllegio que el conçeio de la dicha çibdat an en razon de las debdas que los christianos deuen a los judios, segun lo guardaron a los otros vezinos mientras que ellos andodieron fuera dende.

Et non fagades ende al por ninguna manera, so pena de la mi merçed, ca mi voluntad es que lo fagades asy entendiendo que es mio seruiçio et poblamiento desa çibdat. Et de commo uos esta mi carta fuere mostrada la conplierdes, mando a qualquier escriuano publico, que para esto fuere llamado, que de ende al que esta carta mostrare testimonio signado con su signo porque yo sepa en commo conplides mio mandado; et non faga ende al, so la dicha pena et del ofiçio de la escriuania. La carta leyda, datgela.

Dada en Valladolid, dos dias de março, era de mill et trezientos et setenta annos. Yo, Diego Perez, de la camara, la fiz escreuir por mandado del rey. Pascual Ferrandez. Pedro Ruiz, vista. Pedro Ferrandez.

CXCIV

1332-III-3, Valladolid. Provisión real de Alfonso XI al concejo de Murcia. Ordenando que recibiesen juramento de los antiguos partidarios de don Juan Manuel antes de acogerlos como vecinos de la ciudad y proceder a la devolución de sus bienes.
(A.M.M. C.R. 1314-1344, f. 87r-v).

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe, et senor de Vizcaya et de Molina. Al conçeio de la çibdat de Murçia, et a los alcalles et alguazil et los jurados de la dicha çibdat o a qualquier o a qualesquier de uos, que esta mi carta vieredes, salut et graçia.

Sepades que Furtado Ruyz de Gamarra et Gil de Moncada, por sy et con carta et poder que me troxieron de Nicolas Segui et de Gil Sanchez de Lienda et de Johan de Claremont et de Sancho Perez de Lienda et de Pedro Çanoy, venieron a mi et pedieronme merçed, por sy et por los sobredichos, que pues eran despendidos et partidos de don Johan, fijo del infante don Manuel, cuyos vasallos eran, que fuese la mi merçed que fuesen mios vasallos et que les mandase coger y en la çibdat de Murçia donde eran vezinos et naturales, et tornar todo lo suyo segunt lo auian el dia que dende salieron. Et yo, veyendo que era mio seruiçio et poblamiento desa çibdat, touelo por bien et reçeбилos por mios vasallos et fezieronme pleito et omenaje et jura, por sy et por los sobredichos, commo vasallos



deuen fazer a su rey et a su sennor natural, de guardar todo mio seruicio et mio sennorio et pro et onra desa çibdat et de non mouer y alboroço nin bolliço.

Et agora yo tengo por bien que los acojades y, en la çibdat, faziendo primera-
mente pleito et omenaje et jura todos los sobredichos al mio adelantado de guar-
dar y todo mio seruicio et mio sennorio et esa çibdat de danno et de peligro, et
non poner y bolliço nin alboroço ninguno.

Porque uos mando, luego, vista esta mi carta, que ellos auiendo fecho el dicho
pleito et jura ante los ofiçiales dende et vn escriuano publico, que acojades y en
la dicha çibdat a los dichos Furtado Roiz de Gamarra et a Gil de Moncada et a
Nicolas Segui et a Gil Sanchez de Lienda et a Johan de Claramunt et a Sancho
Perez de Lienda et a Pedro Çanoy, mios vasallos, con todas sus conpannas, et que
los ayades et tengades por amigos et por parientes et por vezinos en ofiços et en
todas otras cosas, asi commo a mios vasallos et naturales et vuestros vezinos,
segunt faziades ante que dende saliesen et segunt fagades a los otros vezinos
dende.

Et otrosy, que les fagades entregar todo lo suyo, segunt lo auian el dia que
dende salieron, conpliendo ellos de fuero et de derecho a qualquier que quere-
lla aya dellos, de commo mas conplidamente ge lo enbio mandar por mi carta al
dicho adelantado.

Et non fagades ende al por ninguna manera, so pena de la mi merçed, que
sabed que mi voluntad es que lo fagades asy, teniendo que es mio seruicio et pro
et onra de la dicha çibdat. Et de commo uos esta mi carta fuere mostrada et la
conplierades, mando a qualquier escriuano publico de la dicha çibdat de Murçia,
que para esto fuera llamado, que de ende al que esta carta mostrare testimonio
signado con su signo porque yo sepa en commo conplides mio mandado; et non
faga ende al, so pena del ofiço de la escriuania. La carta leyda, datgela.

Dada en Valladolid, tres dias de março, era de mill et trezientos et setenta
annos. Yo, Diego Perez, de la camara, la fiz escreuir por mandado del rey. Pascual
Ferrandez. Pedro Rodriguez, vista. Pedro Ferrandez.

CXCV

**1332-III-4, Valladolid. Provisión real de Alfonso XI al concejo
de Murcia, ordenando pagar el almojarifazgo a don Samuel
Aben Mudur y don Solimán Abenaex. (A.M.M. C.R. 1314-1344, f.
86r-v).**

Don Alfonso, por la graçia de Dios, rey de Castiella, de Toledo, de Leon, de
Gallizia, de Seuilla, de Cordoua, de Murçia, de Jahen, del Algarbe, et sennor de

